

# SAN DONA' DI PIAVE



## 'A baracheta in grava

tempo di lettura: 3'

In grava, so 'a riva sinistra del Piave, a l'altezza de San Donà, fin dai primi del 1900, ghe iera na baracheta posizionada poc pì avanti de 'a riva da Nane. Nissun sa pì dove che é 'a riva da Nane: adess se podarìa posizionarla poc p'in là de 'a fine del parco fluviale e squasi in riva al Piave. 'A baracheta iera abitada daea Italia, na femeneta picenina de età indefinìa che poéa ver trenta ani come zinquanta, de pèe de coeor... insoma, no so dir de che coeor, ma scuro, e nissun à mai savest se jera parché no 'a se lavéa o se la iera fata cussì. 'A vea un mario senpre inbriago e par sbarcar el lunario 'a fea el mestier pì vecio del mondo.

S-ciopa 'a guera del 15/18 e ea continua a mandar vanti 'a fameja come che la é bona. Al tempo de 'a rotta de Caporetto, quando 'l esercito se sfalda come el burro e tuta l'Italia precipita int'el dramma, 'a Italia, invenze de scampar come Cadorna e come che li é stati obligai a far tuti i civi, direti verso l'Emilia e verso el Sud Italia, ea invenze no, no 'a s'à gnanca moss, inpavida... e col fronte 'l é rivà sul Piave 'a s'à trovà proprio in mezzo. Ma sicome *co é guera é guera par tuti*, ea s'à mess a nincurar i miitari italiani in ritirata, che in mezo a tanta disgrazia i se cioéa un atimo de respiro e i fea 'a fia fora de 'a baraca, ma de corsa, che bisognéa scanpar. Co 'a fia fora de 'a baracheta, 'a Italia ghe tegnèa testa a tuti, dando el ritmo a' pressa. E quando che i nostri à traversà el Piave e 'i é passai so 'a sponda de 'à, da 'a parte del Musil, e de qua é riva' i austriaci e i s'à fermà sul Piave, ea 'a é restada là, so 'a so

baracheta, a frontejarli senza paura; e là à continuà a far quel che 'a jera bona: col poc de tedesco che la à inparà in pochi dì, à servìo anca i vari Franz, in fla fora de 'a baracca nonostante che i fusse sul fronte soto 'e s-ciopetae.

Col baston 'a Italia ghe batéa in testa sul elmet (no i véa gnanca el tempo de cavàrseo) a quei che ghe metéa massa foga, via un e soto che'altro. I Taliani, da de 'à, i bombardéa, ma distante da 'a baracheta de 'a Italia, come par na sort de rispetto e de riconoscenza. 'A Italia, picoea de statura ma granda de cuor, à continuà 'a so mission. Oto mesi dopo, quando che i austriaci dopo 'a Bataglia del Solstizio i s'è ritirà e qua é tornà i italiani, ea, 'a Italia nostra, jera ancora là, so 'a o baracheta restàa intiera, e paréa che li vesse spetài, contenta de védarli tornar; e come se gñent fusse stat, 'a è tornàa a sodisfar i vari Piero, Bepi e Toni, anca lori contenti de rivédarla; e col baston 'a batéa so elmeti dal suon diverso.

Ma 'a Italia no la é stata l'unica a salvar 'l onor de l'Italia, in mezo a tanti che scanpéa in fuga: a Eraclea iera n'altra so coèga, sempre al interno del argine, so n'altra baracheta, che anca ea 'a ga tegnù testa ai do eserciti.

Se dize che tute do 'e sie state insignie de na onorificenza da parte del esercito italian, par el servizio dato, e par no essar scampae di fronte al nemico, anzi par verlo fermà. L'onorificenza al merito de guera pì vecia al mondo.

## STORIE DEL PRESIDENTE